

**Pwyllgor yr Economi,
Masnach a Materion Gwledig**

**Economy, Trade and
Rural Affairs Committee**

Senedd Cymru

Bae Caerdydd, Caerdydd, CF99 1SN
SeneddEconomi@senedd.cymru
senedd.cymru/SeneddEconomi
0300 200 6565

Welsh Parliament

Cardiff Bay, Cardiff, CF99 1SN
SeneddEconomy@senedd.wales
senedd.wales/SeneddEconomy
0300 200 6565

Lesley Griffiths AS
Y Gweinidog Materion Gwledig a Gogledd
Cymru, a'r Trefnydd

30 Mawrth 2022

Annwyl Weinidog,

Craffu ar Fframweithiau Cyffredin: Fframwaith Cyffredin Dros Dro ar Gynhyrchion Organig

Ar 3 Mawrth, trafododd y Pwyllgor ymhellach ei ddull o ymdrin â saith Fframwaith Cyffredin Dros Dro sy'n dod o fewn ei gylch gwaith ac sydd nawr yn cael eu cyhoeddi i graffu arnynt. Penderfynodd y Pwyllgor flaenoriaethu tri o'r fframweithiau ar gyfer briffio technegol gan swyddogion Llywodraeth Cymru ar y fframweithiau yn ei gyfarfod ar 17 Mawrth. Ar gyfer y fframwaith y mae'r llythyr hwn yn ymwneud ag ef, cytunwyd y byddai'r gwaith craffu yn cael ei wneud drwy ohebiaeth. Felly, byddai'r Pwyllgor yn croesawu rhagor o wybodaeth am yr hyn a ganlyn:

Pwyntiau cyffredinol

- Mae'r fframwaith yn cynnwys nifer o wallau a therminoleg a diagramau anghyson. A allwch egluro pam na gywirwyd y rhain drwy brosesau cymeradwyo mewnol cyn ei gyhoeddi?
- Mae'r fframwaith yn nodi bod anghytundeb parhaus rhwng y llywodraethau ynglŷn â'r hyn sydd wedi'i gadw yn ôl a'r hyn sydd wedi'i ddatganoli. A allwch egluro beth yw'r anghytundeb hwn, ac egluro pam nad yw'n effeithio ar weithrediad y fframwaith?



Cwmpas

- Egluro cwmpas y fframwaith ac a yw'n ymwneud â rheoli rheoliadau a lywodraethwyd yn flaenorol gan yr UE yn unig, neu bolisi cynhyrchion organig yn ei gyfanrwydd?
- Os yw'r fframwaith yn ymwneud â pholisi cynhyrchion organig yn ei gyfanrwydd, esbonio sut mae hyn yn wahanol i'r ffordd y cafodd polisiau cynhyrchion organig eu llywodraethu cyn i'r DU ymadael â'r UE?
- Cadarnhau a oes gan Lywodraeth Cymru yr un hyblygrwydd i ddatblygu'r cyfreithiau a pholisiau cynhyrchion organig yr oedd ganddi cyn diwedd y cyfnod pontio?
- Mae'r fframwaith yn nodi ei fod yn rhyngweithio â nifer o fframweithiau eraill. Sut caiff y rhyngweithio hwn ei reoli?

Gwneud penderfyniadau: Gweithgor y Pedair Gwlad

- A yw'r grŵp yn strwythur llywodraethu newydd ar gyfer gwneud penderfyniadau ar y cyd ar yr holl bolisiau cynhyrchion organig, neu ai dim ond mecanwaith ar gyfer rheoli ymwahanu ydyw?
- A fydd unrhyw asesiad o newid polisi arfaethedig yn y DU a ddatblygwyd gan un o'r partion yn cael ei rannu â rhanddeiliaid?
- A fydd y broses benderfynu sy'n gofyn am hysbysu ac asesu cydweithredol yn arwain at oedi yn y broses o lunio polisiau?
- Os caiff cynigion eu newid o ganlyniad i'r broses benderfynu yn y fframwaith, a fyddwch chi'n hysbysu'r Senedd a rhanddeiliaid?

Gwneud penderfyniadau: Grŵp Arbenigol y DU ar Gynhyrchu Organig

- A allwch egluro pam nad yw'r Grŵp Arbenigol wedi'i sefydlu eto a beth yw'r amserlen ar gyfer ei sefydlu?
- A allwch egluro pa sylfaen dystiolaeth sy'n cael ei defnyddio wrth wneud penderfyniadau yn absenoldeb y Grŵp hwn?

Gwneud penderfyniadau: Awdurdod Cymwys

- Yn ei rôl fel Awdurdod Cymwys, a fydd Defra yn gweithredu fel llywodraeth ar gyfer y DU gyfan neu fel llywodraeth Lloegr?
- Mae'r fframwaith yn nodi y bydd yr Awdurdod Cymwys yn chwarae rhan ym musnes y llywodraeth. A allwch egluro beth y mae hyn yn ei olygu ac ar ran pwy y byddent yn gweithredu yn y rôl hon?
- Mae'r fframwaith yn awgrymu y bydd yr Awdurdod Cymwys yn gyfrifol am benderfyniadau labelu a logos ond hefyd y bydd y Partion yn cymryd rhan. A allwch egluro sut y bydd penderfyniadau ar logos a labelu yn cael eu gwneud?

Ymwahanu

- Defnyddir termau gwahanol i ddisgrifio ymwahanu yn y fframwaith. A allwch egluro ar ba sail y bydd y Partion yn penderfynu a yw ymwahanu yn niweidiol neu'n dderbyniol?

Deddf Marchnad Fewnol y DU

- Sut mae'r fframwaith yn rhyngweithio â Deddf Marchnad Fewnol y DU?
- A yw Llywodraeth Cymru yn bwriadu ceisio eithriad ar gyfer y fframwaith hwn o Ddeddf Marchnad Fewnol y DU?

Protocol Gogledd Iwerddon

- Egluro'r risgiau, os oes rhai, sy'n gysylltiedig ag ymwahanu â Gogledd Iwerddon ar reoleiddio cynhyrchion organig a sut y caiff hyn ei reoli drwy'r fframwaith?

Tryloywder ac Atebolrwydd

- Mae'r fframwaith yn nodi y bydd ymgynghori â rhanddeiliaid yn parhau ar gyfer newidiadau rheoleiddiol mawr. A allwch egluro beth fyddai'n cael ei ystyried yn newid mawr ac egluro pa fath o newidiadau na fyddai gwaith ymgynghori â rhanddeiliaid yn cael ei wneud yn eu cylch?
- Mae'r fframwaith yn nodi y bydd y llywodraethau'n rhoi'r wybodaeth ddiweddaraf i seneddau yn eu priod wledydd 'lle bo'n briodol'. A allwch egluro beth mae'r term hwn yn ei olygu'n ymarferol?

Diolch ymlaen llaw am roi'r wybodaeth hon i'r Pwyllgor. Byddai ymateb erbyn 29 Ebrill o gymorth i'r Pwyllgor.

Yn gywir,

A handwritten signature in black ink that reads "Paul Davies". The signature is written in a cursive style with a large initial 'P'.

Paul Davies AS

Cadeirydd: Pwyllgor yr Economi, Masnach a Materion Gwledig

Croesewir gohebiaeth yn y Gymraeg a'r Saesneg / We welcome correspondence in Welsh or English.

